



與宋齊名者公也由是以觀公又非但
超出江南乃有唐一代第一流人物也
然公聲名燁燁在人口耳非直以其相
業在當時且甚有文名史稱其七歲知
屬文張說謂其為後出詞人之冠又與
徐堅評其文如輕縑素練實濟時用柳
宗元亦謂其能以比興兼著述予生公
六百餘年之後慕公之為人童稚時嘗

得韶郡所刻金鑑錄讀之灼知其偽有志求公全集刻梓以行世自來

京師游太學入官翰林每遇藏書家輒訪求之竟不可得蓋餘二十年矣歲己丑始得公曲江集於館閣群書中手自鈔錄僅成帙聞先妣太宜人喪因携南歸期免喪後自備梓刻之道韶適友人五羊涂君暉倅郡偶語及之太守毘陵蘇

曲江集序



古今說者咸曰唐相張文獻公嶺南第一流人物也嗟乎公之人物豈但超出嶺南而已哉蓋自三代以至于唐人才之生盛在江北開元天寶以前南士未有以科第顯者而公首以道侔伊呂科進未有以詞翰顯者而公首掌制誥內供奉未有以相業顯者而公首相玄宗

公薨後四十餘年浙士始有陸敬輿閩士始有歐陽行周又二百四十餘年江西之士始有歐陽永叔王介甫諸人起於易代之後由是以觀公非但超出嶺南蓋江以南第一流人物也公之風度先知見重於玄宗氣節功業著在信史播揚於天下後世唐三百年賢相前稱房杜後稱姚宋胡明仲謂姚非宋比可

君諱同知莆田方君新謂公此集乃韶之文獻請留刻郡齋嗟乎公之相業世孰不知其文則不盡知也矧是集藏館閣中舉世無由而見苟非為鄉後進者表而出之天下後世安知其終不泯泯也哉是以不揆愚陋僭書其首

成化九年龍集癸巳仲春初吉

翰林院侍

講學士瓊臺丘濬序

唐丞相曲江張先生文集卷之一

頌贊賦

龍池聖德頌并序

開元紀功德頌并序

聖應圖贊并序

開元正歷握乾符頌并序

白羽扇賦并序及御批

荔枝賦并序

龍池聖德頌

臣聞昔者玄德升聞皇天眷命元聖有作上帝何言



必見意於休徵不忘象於幽贊惟茲降鑒若曰專精
道周萬物者其神充功濟生人者其祥大粵若古始
肇有君臣巢燧之前寂寞無紀書契而後煥炳可觀
若乃鬼神睢盱品彙紛錯性命未正吉凶不定而太
昊氏將通其德則河爲之出圖人食未粒鳥獸是茹
時不耕稼噐無耒耜而神農氏將教其本則天爲之
雨粟蚩尤不道炎帝不制銅鐵鑄兵豺狼橫厲而軒
轅氏將禁其暴則天爲之降玄女洪水方割下人昏
墊堯德莫能弭其災舜功不能除其害而夏后氏將
底其績則洛爲之出書自茲以還殆三千歲矣其間

木火更王雲物告符有若狼銜鈎魚躍舟素靈哭黃
星見豈不以湯德有慙武善未盡漢道旣維魏方亦
偏唯以一至之應且爲興王之兆則未有錫真符聖
受明命遠與大禹相續超與上皇比崇如我國家之
盛者焉洪惟龍池蓋天之所以祚聖即今上下居之
舊真京師爽塏之所傍無竇澤中勿濫泉非常而靈
液涓流無幾而神池浸廣榮光休氣若煙若雲所未
嘗有則此之出清可以鑑而深不見底鱗介瑰詭於
物其中時莫知其所然日徒見其有異中宗採識者
之議壓王氣而來遊聖上處或躍之時出飛龍而合

應臨淄始封也邱第在馬上黨歷試也靈符紹至天
其以是求命我唐圖象丁寧有所底止其若茲也夫
成數有時而否至理無代而亡固在乎大聖之生乘
運而作鼓天下之動安天下之危故將順成功自古
之啓佑也如彼充定多難自天之叶贊也如此初中
宗韋氏后黨窺隙大盜狃於得志羣慝起而擅權若
綴旒然當此時也天與若不取鬼謀或不協則我祖
宗之業無乃將墜而億兆之命亦猶倒懸聖上震之
提劍而起雷霆一奮袂袵以清內難旣衰外虞有謚
推戴太上照臨萬邦實天之爲與人更始系皇統維

乾綱決綻補壞蕩瑕滌穢而乃闕典咸備舊章悉舉
處窮盡達在困必通品物資以再生寰區爲之一變
然後返華僞於朴還澆漓於淳以大道爲原以至仁
爲根動推是心以御於事人見德而興行神享誠而
介福故不在於刑罰不在於禱請大造裁成玄猷允
塞有如陽春播澤觸類皆滋太山起雲無遠不徧雖
昆虫草木與蠻貊要荒樂其所生安其所習在牛羊
而勿踐有干戈而載戢又況於衣冠華夏禮樂家邦
而不刑於斯湏不久於漸漬者也夫然何教非德何
化非經何能事之不舉何醇精之未極周溥洋溢於

穆緝熙至於太和莫不允若體侔天地之大事出皇王之表豈擎蹠曲拳盡禮極力將用彥聖不啻其口所能稱誦於吾君所可殆庶於至德且往者之有開也天感精以降聖聖敬命以奉天此誠有元則欽明文思及茲報本必嚴祇齋栗靈慶以屬之神化以答之與初相明其徵乃著絲綸先兆非篤信歟由是言之統天者人合符者聖而差德序命殊尤卓絕豈多乎哉至如古之興王必有所感五帝更尚五運旁通土者黃中之精於金爲王水者善利之物於土爲配苟膺期而有來必合德而爲表是則然矣天其或者

亦以阜育群化發揮茂祉始告以聖有明徵終成乎帝之神冊因其立象之本會以相乘之數則載代六百歷紀千年變而通之胡可量也宗子宗正卿褒信郡王璆等若干人伯父伯兄仲叔季弟聚族相與詣闕上言天意昭著固已久矣人事符合亦云至矣而一德是建太階旣平靈臺靈沼赫赫明明天之爲大雖莫能名皇王之鎬豈無頌聲上初克讓抑而未許至於累請乃曰俞哉史臣不敏敢獻頌曰

茫茫元昊載凝載薄在帝庖犧繼天而作浩浩洪水包山襄陵舜亦命禹夏氏以興龍圖龜書二王是膺

湯武已下夫何足徵

右元命

於鑠巨唐乘運而起績禹之迹系堯之紀五聖在天
丕命曾孫高視河洛同符混元亦有黃龍出於靈沼
明明穆穆天子之表

右聖德

倬彼東井昭章于天沉精降液下爲靈泉靈泉有泚
其深無底泌之洋洋其甘如醴清德之鑑柔道之體
洪源濬規實天之啓

右靈泉

濯濯靈泉洞冥皇祇滋液流行化爲神池曰止曰行
惟聖之作匪鱣匪鮪惟龍之躍植物斯生動物斯樂
天眼有見曾是不涸

右神池

靈有休氣紛紛郁郁如山之包如雲之簇潛龍在下
瞻烏斯屋兆云其吉周爰咨詢旣契我龜又叶我人
鎬雖舊京其命惟新

右休氣

蜿蜿黃龍神池自出靈化恍惚噴雲沃日告帝之符
其儀孔吉或潛于泉或見于田與時順動亦應乎天

克配我皇無得稱焉

右黃龍

開元紀功德頌并序

臣聞蠻夷猾夏唐虞已然天之所生類不可絕嘗有拓境者矣而固也爲患或有款塞者矣必也無親是以古之哲王審其若此則限以荒服斷非純臣不貢不王武功居後不庭不率文德是先三代所以直道百蠻所以向化迨乎春秋之衰諸侯以力征伐自出戎心大啓謀夏亂華干盟徧好王網弛而若綴天道厭而將革則有強能攘劫暴惡交侵雖雜霸之無成

亦反經之所取其負力者乃塹山堙谷盡境而築長城其黷武者則輓粟飛葛窮兵以耗中國又失於下策而悔在末年彼王畧之不恢殆千餘載矣夫有其虞而無豫思其患而不圖所謂能國將安貴聖物豈終否道非固窮鑑之者昊天救之者英主玄命陰隲畀付神武我太宗一戎衣而大定我皇帝再受命而太平不是古而務文不非今而忘戰以時變而消息元與天而合符日月之所照臨陰陽之所陶冶凡有在地莫不稟朔而東夏郡縣北隰山戎先是四十年侵軼數百里自茲氣奪數以病告旣威讓之不恭且

力制之不可或朝或否為虺為蛇幽郭未遑以滅烽
邊城安得而弛柝曠日持久兵連禍挈率由事邊是
無寧歲二十二年春乃命右羽林大將軍兼御史中
丞幽州長史張守珪將中軍都督諸鎮雄名先路夷
裔生風載馳信臣繼發精卒戒嚴有赫張皇若神公
卿大夫未始測也將校部曲亦莫知也皇帝方日靖
以慮之乾綱以斷之初決策於九重已收功於萬里
矣二十二年冬十有二月中貴將命元戎受律三軍
疾雷於非時二庭喪膽於非意欲遁則衆潰不保欲
拒則兵鋒莫當因而偽降幸且紆禍遽圖反覆將肆

鴟張觀釁先人豈伊負我以間謀而情得乘猜携而
計從或竒兵以嘗或厚利以啗無何變作果自族誅
克元惡首鬼惑神誘假天威而無前覆鳥巢而何有
於是諸部大駭率衆復歸責以不義之尤捨其不臣
之罪既服即序有威且懷載籍以來固未之見也昔
我睿祖取句驪於拾遺今茲聖謀易林胡於反掌獻
功有續後嗣無忘百王所廢之勳四夷未賓之俗自
我底定魏乎登皇其若此也於是彼節使與群帥因
東師之凱旋離而族談合而公議以為主上憫一隅
之苦垂不伐之畧以計易戰以信去兵神斷自天虜

平不日且軍未血刃敵免膏原密承無方之謀坐致
不陣之捷有征無戰即王者之師歟而不彰美於吾
君得無臣子之罪不表聖於帝載曷稱文武之時乃
率其屬至於固請帝三讓德而曰俞哉夫曲成萬類
者天爲而不有下濟兆庶者聖成而不居物無謝生
於天雖云至道人無歸功於聖何以最靈雖無已無
名所宜絕於言象而惟忠與義固不廢於頌述大雅
云徐方旣同天子之功又曰明明天子令聞不已其
此之謂也臣再拜頓首敢獻頌曰
赫赫天威兮被遐荒蠢茲山戎兮不來王命南仲兮

整六師出幽陵兮轡九夷簸赤山兮蕩滄海弔無告
兮伐有罪徒不勤兮車不殆虜震驚兮兵氣倍昔負
固兮今安在魁自殲兮裔旣平謀旣集兮聖自明我
不戰兮獻戎捷俾厥後兮揚天聲

聖應圖贊并序

臣聞啓聖者天也宜有以覺悟受命者聖也必有以
明徵故神不言而可知時將至而先兆當陛下龍潛
上黨也或託類於雲物或效靈於卜筮意者天之丁
寧垂象唯恐後時又以潞水之泓深山鹿之捷走馳
騎是獲厲流不濡非力所能以明或躡乾之上體時

在九四神道幽贊聖期密邇自後而占何著明其若
此蓋天福海內地降聖跡以瑞非常之后以決如神
之策至于再三明必信耳有郡掾崔弼時其從行見
龍騎先馳謂河流可涉亦既數步遽已滅頂不沉也
安足以驗飛無凡也於何以昭聖事來自久命常惟
新臣不勝至願謹爲聖圖遂獻贊曰
龍之或躍泉有可深神亦成象化爲背禽凌厲足獲
明命則忱如彼從掾焉能不沉

開元正曆握乾符頌并序

臣伏見景寅制書以開元曆握乾符垂示天下幸甚

其沙門玄侶等所言益部著舊傳洛下閔改顓頊曆
推校最爲精密而曰後八百歲其曆差一日當有聖
人定之至于今曆果有差聖果有定誠非常之嘉應
曠代之靈符不可得而聞也臣誠歡誠喜臣聞天道
先聖而啓期聖人後天而奉時不當乎天心不在曆
數不登乎聖道不合元符玄命定而王者應幽數起
而明者察故洛下閔極其數而知來著舊傳尚其占
而示後我皇帝無思而感自然玄同僧玄侶等幸會
而言豈云素慮非人事也非神道也天固已儲祥以
俟時積分以差日出入數代多曆年所疇人極力不

能課其祥上林雜候亦莫徵其失則明天意以後聖
期期數未臻乃藏於密聖證將至如應如響彼幽深
之何有此會通之不謀所以下叶黃鐘上稽玄象以
和六氣以合三光復其見心間不容髮斗樞且運而
况於人時元氣已調而况於月令於戲天下之動日
用不知昆蟲草木生者自遂麟鳳龜龍靈者自瑞蠻
夷戎狄遠無不至山川鬼神幽罔不洎此聖人所以
定天下之象通天下之志天人之道備也昔者河出
圖洛出書自時厥後符命非一空文而無應其殆乎
人為實錄而有徵焉用乎龍負則洛下閎者此其神

乎不然是何見之明也夫聖有時而不作物無聖而
不覩仲尼感時於鳳鳥古人嘆壽於清河皆傷於不
達而恨於難見我后受成命重光乎文武累聖而無
窮殊祥而無數彼哀命之者曾不得而朝聞凡今之
人誠何幸而目覩由是觀之當其來運唐虞之屋可
封非其有時孔丘之徒不遇此千載之會也萬物豈
知其謝生於天乎兆人亦云忘力於帝乎微臣荷寵
靈揚休命則臣子之志在於盡美而惟天之大終莫
能名不勝區區敢獻頌曰
於皇惟后受命于天時來于今兆是厥先既定乃日

允叶斯年赫赫光明應于上玄

白羽扇賦并序

開元二十四年夏盛暑奉勅使大將軍高力士賜宰
臣白羽扇其與焉竊有所感立獻賦曰

當時而用在物所長彼鴻鵠之弱羽出江湖之下方
安知煩暑可致清涼豈無紈素采畫文章復有脩竹
剖析毫芒提携密邇搖動馨香惟衆珍之在御何短
翮之敢當而竊思於聖后且見持於未央伊昔臯澤
之時亦有雲霄之志苟效用之得所雖殺身之何忘
肅肅白羽穆如微風縱秋氣之移奪終感恩於篋中

御批答

朕頃賜扇聊以滌暑卿立賦之且見情素詞高理妙
朕詳之久矣然佳彼勁翮方資利用與夫棄捐篋笥
義不當也

荔枝賦并序

南海郡出荔枝焉每至季夏其實乃熟狀甚瓌詭味
持甘滋百菓之中無一可比余徃在西掖嘗盛稱之
諸公莫之知而固未之信唯舍人彭城劉侯弱年遷
累經于南海一聞斯談倍復喜歎以爲甘旨之極也
又謂龍眼凡菓而與荔枝齊名魏文帝方引蒲桃及

龍眼相比是時二方不通傳聞之大謬也每相顧閑
議欲爲賦述而世務卒卒此志莫就及理郡暇日追
叙往心夫物以不知而輕味以無比而疑遠不可驗
終然未屈况士有未效之用而身在無譽之間苟無
深知與彼亦何以異也因道揚其實遂作此賦菓之
美者厥有荔枝雖受氣於震方實稟精於火離乃作
酸於此裔爰負陽以從宜蒙休和之所播涉寒暑而
匪虧下合圍以擢本傍蔭畝而抱規紫紋紺理黛葉
紺枝蒼鬱而霑霽對環合而焚纒如蓋之張如帷之垂
雲煙沃若孔翠于斯靈根所盤不高不卑陋下澤之

沮洳惡層崖之嶮巖彼前志之或妄何側生之見在
爾其勾芒在辰凱風入律肇允含滋芬敷謐溢綠穗
靡靡青英苾苾不豐其華但甘其實如有意乎敦本
故徵文而妙質蒂葯房而擗萃皮龍鱗以駢比膚玉
英而含津色江萍以吐日朱苞剖明璫出罔然數寸
猶不可疋未玉齒而殆銷雖瓊漿而可軼彼衆味之
有五此甘滋之不一伊醇淑之無準非精言之能悉
聞者歡而竦企見者訝而驚伋心恚可以蠲忿口爽
可以忘疾且欲神於醴露何比數之相橘援蒲桃之
見擬亦古人之深疾若乃卑軒洞開嘉賓四會時當

煥煜客或煩憤而斯果在焉莫不心侈而體快信雕
盤之仙液實玳筵之綺績有終食於累百愈益氣而
治內故無厭於所甘雖不貪而必愛沉美李而莫取
浮甘瓜而自退豈一座之所榮冠四時之爲最夫其
貴可以薦宗廟其珍可以羞王公亭十里而莫致門
九重兮曷通山五嶠兮白雲江千里兮清楓何斯美
之獨遠嗟爾命之不工每被銷於凡口罕獲知於貴
躬柿可稱乎梁侯梨何幸乎張公亦因人之所遇孰
能辯乎其中哉

唐丞相曲江張先生文集卷之一

唐丞相曲江張先生文集卷之二

詩

奉和聖製二十七首

樂章二首

和酬諸公詩二十八首

奉和聖製南郊禮畢酬宴

配天昭聖業率土慶輝光春發三條路醮開百戲場
流恩均庶品縱觀聚康莊妙舞來平樂新聲出建章
分曹日抱戴赴節鳳歸昌幸奏承雲樂同晞湛露陽
氣和皆有感澤厚自無疆飽德君臣醉連歌奉栢梁

奉和聖製早渡蒲津關

魏武中流處軒皇問道迴長堤春樹發高掌曙雲開
龍負王舟渡人占仙氣來汀津會日月天仗役風雷
東顧重關盡西馳萬國陪還聞股肱郡元首詠康哉
奉和聖製幸晉陽宮

隋季失天策萬方罹凶殘皇祖稱義旗三靈皆獲安
聖期將申錫王業成艱難盜移未改命曆在終履端
彼汾惟帝鄉洪都信鬱盤一月朔巡狩群后陪清鑾
霸迹在沛庭舊儀覩漢官唐風思何深舜典敷更寬
家蒙粉榆復邑爭牛酒歡緬惟剪商後豈獨微雨歎

三后既在天萬年斯石刊尊祖續皇天文皆仰觀

奉和聖製同二相南出雀鼠谷

設險諸侯地承平聖主巡東君朝二月南旆擁三辰
寒出重關盡年隨行漏新瑞雲叢捧日芳樹曲迎春
舞詠先馳道恩華及從臣汾川花鳥意併奉屬車塵
奉和聖製次成臯先聖擒建德之所

天命誠有集王業初惟艱剪商自文祖夷項在茲山
地識斬蛇處河臨飲馬間威加昔運往澤流今聖還
尊祖頌先烈賡歌安用攀紹成即我后封岱出天關
奉和聖製過王濬墓

漢皇思鉅鹿晉將在弘農入蜀舉長筭平吳成大功
與渾雖不協歸浩實爲雄孤績淪千載流名感聖衷
萬乘渡荒隴一顧凜生風古節猶不棄今人爭效忠

奉和聖製經孔子舊宅

丘門大山下不見登封時徒有先王法今爲明主思
恩加萬乘幸禮致一牢祠舊宅千年外光華空在茲

奉和聖製經河上公廟

昔者河邊叟誰知隱與仙姓名終不識章句此空傳
跡爲坐忘晦言猶強著詮精靈竟何所祠宇獨依然
道在紆宸睠風行動睿篇從茲化天下清淨復何先

奉和聖製賜諸州刺史以題座右

聖人合天德洪覆在元元每勞蒼生念不以黃屋尊
興化俟群辟擇賢守列藩得人此爲盛咨岳今復存
降鑒引君道慇懃啓政門容光無不照有象必爲言
成憲知所奉致理歸其根肅肅稟玄猷煌煌戒朱軒
豈徒任遇重兼爾宴錫繁載聞勵臣節持答明主恩

奉和聖製瑞雪篇

雜言

萬年春三朝日上御明臺旅庭實初瑞雪兮霏微俄
同雲兮蒙密此時騷切陰風生先過金殿有餘清信
宿嬋娟飛雪度能使玉人俱掩嫋皓皓樓前月初白

紛紛陌上塵皆素昨訝驕陽積數旬始知和氣待迎新
匪惟在人利曾是扶天意天意豈云遙雪下不崇朝
皇情翫無斃雪委方盈尺草樹紛早榮京坻宛先積
君恩誠謂何歲稔復人和預數斯箱慶應如此雪
多朝冕旒兮載悅想臺笠兮農節倚瑤琴兮或歌續
薰風兮瑞雪福浸昌應尤盛瑞雪年年常感聖願以
栢梁作長爲柳花詠

奉和聖製早發三鄉山行 七言

羽衛森森西向秦山川歷歷在清晨晴雲稍卷寒巖
樹宿雨能銷御路塵聖德由來合天道靈符即此應

時巡遺賢一一皆羈致猶欲高深訪隱淪

奉和聖製溫泉歌 雜言

有時神物待聖人去後湯還冷來時樹亦春今茲十
月自東歸羽旆逶迤上翠微溫泉谷恣恣佳氣色離宮
弈弈斗光輝臨湄川近天邑浴日溫泉復在茲群仙
洞府那相及吾君利物心玄澤浸蒼黔漸漬神湯無
疾苦薰歌一曲感人深

奉和聖製燭龍齋祭 四言

上帝臨下鑒亦有光孰云陰隲惟聖克彰六月徂暑
四郊僭陽我后其勤告于壇場精意克溢群靈鼓舞

蔚兮朝雲霈然時雨雨我原田亦既有年燭龍煌煌
明宗報祀于以助之天人帝子聞詩有訓國風茲始

奉和聖製喜雨

四言

艱我稼穡載育載亭如物應之曷聖與靈謂我何憑
惟德之馨誰云天遠以誠必至太清無雲羲和頓轡
于斯蒸人瞻彼非覲陰冥倏忽霈澤咸泊何以致之
我后之感無臯無隰黍稷黯黯無卉無木敷芬黜黜
黃龍勿來鳴鳥不思人和年豐皇心則怡豈與周宣
雲漢徒詩

奉和聖製送十道採訪使及朝集使

三年一上計萬國趨河洛課最力已陳賞延恩復博
垂衣深共理改瑟其咸若首路迴竹符分鑣揚木鐸
戒程有攸往詔餞無淹泊昭晰動天文殷勤在人瘼
持久望茲念克終朝所託行已當自強春耕庶秋穫

奉和聖製次瓊岳韻

山祗亦望幸雲雨見靈心岳館逢朝霽關門解宿陰
咸京天上近清渭日邊臨我武因冬狩何言是即禽

奉和聖製送李尚書入蜀

眷言感忠義何有間山川徇節今如此離情空復然
皇心在勤恤德澤委昭宣周月成功後明年或勞還

奉和聖製初出洛城

東土淹龍駕西人望翠華山川祗詢物宮觀豈爲家
十月星迴斗千官日捧車洛陽無怨思巡幸更非賒

奉和聖製謁元皇帝廟齋

興運昔有感建祠北山巔雲雷初締構日月今悠然
紫氣尚鬱鬱玄元如在焉迨茲事追遠輪奐復增鮮
洞府香林處齋壇清漢邊吾君乃尊祖夙駕此留連
樂動人神會鐘成律度圓笙歌下鸞鶴芝朮萃靈僊
曾是福黎庶豈唯味虛玄賡歌徒有作微薄謝昭宣

南郊文武出入舒和之樂 四言樂章

祝史辭正人神慶叶福以德昭享以誠接六變云備
百禮斯浹祀事孔明祚流萬葉

奉和聖製龍池篇

天啓神龍生碧泉泉水靈源浸逸延飛龍已向珠潭
出積水仍將銀漢連岸傍花柳看勝盡浦上樓臺問
是仙我后元符從此得方爲萬歲壽圖川

南郊太尉酌獻武舞作凱安之樂 樂章

馨香惟后德明命光天保肅祀崇聖靈陳信表皇道
玉戚初蹈厲金匏既靜好介福何穰穰精誠格穹昊
奉和聖製送尚書燕國公赴朔方

宗臣事有征廟算在休兵天與三台座人當萬里城
朔南方偃革河陽暫揚旌寵錫從仙禁光華出漢京
山川勤遠略原隰軫皇情爲奏薰琴唱仍題寶劍名
聞風六郡勇計日五戎平山甫歸應疾留侯功復成
歌鍾旋可望枕席豈難行四牡何時入吾君憶履聲

奉和聖製途經華山

萬乘華山下千岩雲漢中靈居雖突密睿覽忽玄同
日月臨高掌神仙仰大風攢峯勢岌岌翊輦氣雄雄
揆物知幽贊銘勲表聖衷會應陪檢玉來此告成功
奉和聖製早登太行山率爾言志

孟月攝提貞乘時我后征晨嚴九折度暮戒六軍行
日御馳中道風師卷太清戈鋌林表出組練雪間明
動植希皇豫高深奉睿情陪遊七聖列望幸百神迎
氣色煙猶喜恩光草尚榮是杲稱萬歲今此復同聲
奉和聖製登封禮畢洛城酺宴

大君畢能事端宸樂成功運與千齡合懽將萬國同
漢酺歌聖酒韶樂舞薰風河洛榮光遍雲煙喜氣通
春華頓覺早天澤倍加崇草木皆沾被猶言不在躬
奉和聖製經函谷關作

函谷雖云險黃河復已清聖心無所隔空此置關城

奉和聖製渡潼關口號

隱嶙故城壘荒涼空戍樓在德不在險方知王道休

奉和吏部崔尚書雨後大明朝堂望南山

迢遞終南頂朝朝闔闔前
竭來青綺外高在翠微先
雙鳳褰爲闕群龍儼若仙
還知到玄圃更是謁甘泉
夜雨塵初滅秋空月正懸
詭容紛入望霽色宛成妍
東極華陰踐西彌嶓冢
連奔峯出嶺外瀑水落雲邊
漢帝宮將苑商君陌與阡
林間鋪近甸煙靄遶晴川
旣庶仁斯及分憂政已宣
山公啓事罷吉甫頌聲傳
濟濟金門步洋洋玉樹篇
徒歌雖有屬清越豈同年

和黃門盧監望秦始皇陵

秦帝始求仙驪山何遽卜
中年旣無效茲地所宜復
徒役如雷奔玠怪亦雲蓄
黔首無寄命赭衣相馳逐
人怨神亦怒身死宗遂覆
土崩失天下龍鬪入函谷
國爲項籍屠君同華元戮
始掘旣由楚終焚乃因牧
上宰議揚賢中阿感桓速
一聞過秦論載懷空杼軸
蘇侍郎紫微庭各賦一物得芍藥

仙禁生紅藥微芳不自持
幸因清切地還遇艷陽時
名見桐君錄香聞鄭國詩
孤根若可用非直愛華滋
和崔黃門寓直夜聽蟬之作

蟬嘶玉樹枝向夕惠風吹幸入連霄聽應緣飲露知
思深秋欲近聲靜夜相宜不是黃金飾清香徒爾爲

和姚令公從幸温湯喜雪

萬乘飛黃馬千金狐白裘正逢銀霰積如向玉京遊
瑞色鋪馳道花文拂綵旒還聞吉甫頌不共郢歌儔

和秋夜望月憶韓席等諸侍郎因以投贈吏

部侍郎李林甫

秋天碧雲夜明月懸東方皓皓庭際色稍稍林下光
桂華澄遠近璧綵散池塘鴻鳳飛難度關山曲易長
揆予秉孤直虛薄忝文章握鏡慙先照持衡愧後行

多才衆君子載筆久辭塲作賦推潘岳題詩許謝康
當時陪宴語今夕恨相忘願欲接高論清晨朝建章
和吏部李侍郎見示秋夜望月憶諸侍郎之
什其卒章有前後行之戲因命僕繼作

清秋發高興涼月復閉霄光逐露華滿情因水鏡搖
同持亦所見異路無相招美景向空盡歡言隨事銷
忽聽金華作誠如玉律調南宮尚爲後東觀何其遼
名數雖云隔風期幸未遙今來重餘論懷此更終朝

和崔尚書喜雨

積陽雖有晦經月未爲災上念人天重先祈雲漢迴

仁心及草木號令起風雷照爛陰霞上交紛瑞雨來
三辰破黍稷四達屏氛埃池溜因添滿林芳爲洒開
聽中聲滴瀝空處影徘徊惠澤成豐歲昌言發上才
無論驗石鼓不是御雲臺直頌皇恩浹崇朝遍九垓

和王司馬折梅寄京邑昆弟

離別念同嬉方榮欲共持獨攀南國樹遙寄北風時
林倩迎春早花愁去日遲還聞折梅處更有棣華詩

和許給事直夜簡諸公

未央鐘漏晚仙宇藹沉沉武衛千廬合嚴扃萬戶深
左掖知天近南窓見月臨樹搖金掌露庭徙玉樓陰

他日聞更直中霄屬所欽聲華大國寶夙夜近臣心
逸興乘高閣雄飛在禁林寧思竊抃者情發爲知音
和裴侍中承恩拜掃旋轡途中有懷寄州縣
官寮鄉園故親

嵩岳神惟降汾川鼎氣雄生才作霖雨繼代有清通
天下稱賢相朝端挹至公自家來佐國移孝入爲忠
霜露多前感丘園想舊風扈巡過晉北問俗到河東
便道恩華降還鄉禮教崇野樽延故老朝服見兒童
和姚令公哭李尚書

貴賤雖殊等平生竊下風雲泥勢已絕山海納還通

忽嘆登龍者翻將弔鶴同琴詩猶可託劔履獨成空
疇昔嘗論體興言每匪躬人思崔琰議朝掩祭遵公
作善神何酷依仁命不融天文靈北斗人事罷南宮
上宰既傷舊下流迷惑哀無恩報國士徒欲問玄穹
張丞相與余有孝廉校理之舊又代余爲荆
州故有此贈襄州刺史宋鼎

漢上登飛幟荆南歷舊居已嘗臨砌橘更覩躍池魚
盛德繼微眇深衷能卷舒義申蓬閣際情坦廟堂初
郡挹文章美人懷燮理餘皇恩儻照亮豈厭承明廬
酬宋使君作

時來不自意宿昔謬樞衡翊聖負明主妨賢媿友生
罷歸猶右職待罪尚南荆政有留裳舊風因繼組成
高軒問疾苦蒸庶荷仁明衰廢時所薄祇言僚故情
酬通事舍人寓直見示篇中兼起居陸舍人

景獻

軒掖殊清秘才華固在斯興因膏澤洒情與惠風吹
所美應人譽何私亦我儀同聲感喬木比翼謝長離
價以陸生減賢慙鮑叔知薄遊嘗獨愧芳訊乃兼施
此夜金閨籍伊人瓊樹枝飛鳴復何遠相顧幸媿媿
和黃門盧侍郎詠竹

清切紫庭垂歲蕤防露枝色無玄月變聲有惠風吹
高節人相重虚心世所知鳳皇佳可食一去一來儀

和蘇侍郎小園夕霽寄諸弟

清風閭闔至軒蓋承明歸雲月愛秋景林堂開夜扉
何言無濟日尚與宴私違興屬蕙蔭變文因棠棣飛
人倫用忠厚帝德已光輝贈弟今爲貴方知陸氏微
和韋尚書荅梓州兄南亭宴集

棠棣聞餘興烏衣有舊曾遊門前杜城陌池上曲江流
暇日嘗繁會清風詠_阻修始知西峙嶽同氣此相求
與袁補闕尋_祭拾遺會此公出行後蔡有五

韻詩見贈以此篇荅焉

轍迹陳家巷詩書孟子鄰偶來乘興者不值草玄人
契是忘年合情非累日申聞君還薄暮見眷及茲辰
贈我如瓊玖將何報所親

酬趙二侍御使西軍贈兩省舊寮

石室先鳴者金門待制同操刀嘗願割持斧竟稱雄
應敵兵初起緣邊虜欲空使車經隴月征旆繞河風
忽枉兼金訊非徒秣馬功氣清蒲海內聲滿栢臺中
顧已塵華省欣君震遠戎明時獨匪報嘗欲退微躬
荅陳拾遺贈竹簪

與君嘗此志因物復知心遺我鍾龍節非無玳瑁簪
幽素宜相重雕華豈所任爲君安首飾懷此代兼金

荅太常靳博士見贈一絕

上苑春先入中園花盡開惟餘幽徑草尚待日光催

酬宋使君見貽

陟隣初稟訓獻策幸逢時朝列且云忝君恩復若茲
庭闈際海曲軺傳荷天慈顧已歡烏烏聞君泣素絲
才明應主召福善豈神欺但願白心在終然涅不緇
武司功初有幽庭春暄見詒夏首獲見以詩
報焉

芳自盡離居幽懷重起予雖言春事晚尚想物華初
遲日噉方照高齋澹復虛筍成林向密花落樹應疎
贈細情無間求鶯思有餘暄妍不相待含歎欲焉如

贈澧陽韋明府

君有百鍊刃堪斷七重犀誰開太阿匣持割武城雞
竟與尚書佩還應天子提何時遇操宰當使玉如泥
酬周判官巡至始興會改秘書少監見貽之
作兼呈耿廣州

惟昔遷樂土迨今已重世陰慶荷先德素風慙後裔
唯益梓桑恭豈稟山川麗于時初自勉揆已無兼濟

瘠土資勞力良書啓蒙蔽一採石室文再擢金門第
既起南宮草復掌西掖制過舉及小人便蕃在中歲
亞司河海秩轉牧江湖蒞勿謂符竹輕但覺涓塵細
一麾尚云忝十駕宜求稅心息已如灰跡率且爲贅
忽捧天書委將革海隅弊朝聞循誠節夕飲蒙瘴厲
義疾耻無勇盜憎攻亦銳葵藿是傾心豺狼何返噬
履險甘所受勞賢惡相曳攬轡但荒服循垓便私第
嘉慶始獲申恩華復尤繼無庸我先舉同事君猶滯
當推奉使績且結拜親契更延懷安旨曾是慮危際
善謀雖若茲至理焉可替所仗有神道况承明主惠

在洪州答綦母學士

旬雨不愆期由來自若時爾無言郡政吾豈欲天欺
常念治厯益惟歡草樹滋課成非所擬人望在東菑
酬王六霽後書懷見示

雲雨俱行罷江天已洞開炎氛霽後滅邊緒望中來
作驥君垂耳爲魚我曝鰓更憐湘水賦還是洛陽才
酬王六寒朝見詒

賈生流寓日楊子寂寥時在物多相背唯君獨見思
漁爲江上曲雪作郢中詞忽枉兼金訊長懷伐木詩
酬王履震遊園林見詒

宅生惟海縣素業守郊園中覽霸王說上激明主恩
一行罷蘭徑數載歷金門既負潘生拙俄從周任言
逶迤戀軒陛蕭散及丘樊舊徑稀人跡前池耗水痕
併看芳樹老唯覺弊廬存自我棲幽谷逢君翳覆盆
孟軻應有命賈誼得無冤江上傷行遠林門偶避暄
地偏人事絕時霽鳥聲繁獨善心俱閉窮居道共尊
樂因南澗藻憂豈北堂萱幽意如投漆新詩重贈軒
平生徇知己窮達與君論

唐丞相曲江張先生文集卷之二

唐丞相曲江張先生文集卷之三
詩

雜著五十首

登南岳事畢謁司馬道士

將命祈靈岳迴策詣真士絕跡尋一徑異香聞數里
分庭八桂樹蕭容兩童子入室希把神登床願啓齒
誘我棄智訣迫茲長生理吸精反自然鍊藥求不死
斯言耿霄漢顧子嬰紛滓相去九牛毛慙嘆知何已
登樂遊春望書懷

城隅有樂遊表裏見皇州策馬既長遠雲山亦悠悠

萬壑精光滿千門喜氣浮花間直城路草際曲江流
憑眺茲爲美離居方獨愁已驚玄髮換空度綠莢柔
奮翼籠中鳥歸心海上鷗既傷日月逝且欲桑榆收
豹變焉能及鸞鳴非可求願言從所好初服返林丘

登襄陽恨峴山

昔年亟攀踐征馬復來過信若山川舊誰知歲月何
蜀相吟安在羊公碣已磨令圖猶寂寞嘉會亦蹉跎
宛宛樊城岸悠悠漢水波逶迤春日遠感寄客情多
地本原林秀朝來煙景和同心不同賞留歎此巖阿

九月九日登龍山

郡庭常窘束涼野求昭曠楚客凜秋時桓公舊臺上
清明風日好歷落江山望極遠何蕭條中留坐惆悵
東彌夏首闊西拒荆門壯夷險雖異時古今豈殊狀
先賢恥不接故老猶可訪投弔傷昔人揮斤感前匠
自爲本踈散未始忘幽尚際會非有欲往來是無妄
爲邦復多幸去國殊遷放且泛籬下菊還令郢中唱
灌園亦何爲於陵乃逃相

三月三日登龍山

伊川與霸津今日祓除人豈似龍山上還同湘水濱
衰顏憂更老淑景望非春襖飲豈吾事聊將偶俗塵

晚霽登王六東閣

試上江樓望初逢山雨晴連空青嶂合向晚白雲生
彼美要殊觀蕭條見遠晴情來不可極日暮水流清

登郡城南樓

閑閣幸無事登樓聊永日雲霞千里開洲渚萬形出
澹澹澄江漫飛飛度鳥疾邑人半鱸艦津樹多楓橘
感別時已屢憑眺情非一遠懷不我同孤興與誰悉
平生本單緒邂逅承優秩謬忝為邦寄多慙理人術
駑鈇雖自勉倉廩素非實陳力儻無效謝病從芝朮

歲初巡屬縣登高安南樓言懷

山城本孤峻憑高結層軒江氣偏宜早林英繁已繁
餘滋含宿霽衆妍在朝暉拂衣釋簿領伏檻遺紛喧
深俯東溪溲遠延南山樊歸雲納前嶺去鳥投遙村
目盡有餘意心惻不可諉竭來彭蠡澤載經敷淺原
春及但生思時哉無與言不才叨過舉唯力酬明恩
美化猶寂寞迅節徒飛奔雖無立成效庶以去思論
行復狗狐迹亦云吾道存

登樓望西山

城樓枕南浦日久顧西山宛宛鸞鶴處高高煙霧間
仙井今猶在滯崖久不還金編惟我授羽駕亦誰攀

簷際千峰遠雲中一鳥閑縱觀窮水國遊思遍人寰
勿復塵埃事歸來且閉關

候使石頭驛樓

山檻憑高望川途眇北流遠林天翠合前浦日華浮
萬井緣津渚千艘咽渡頭漁商多末事耕稼少良疇
自守陳蕃榻嘗登王粲樓徙然騁目處豈是獲心遊
向跡雖愚谷求名亦盜丘息陰芳木所空復越鄉憂

登荊州城樓

天宇何其曠江城坐自拘層樓罅百餘尺迤邐在西隅
暇日時登眺荒郊臨故都纍纍系見陳迹寂寂想雄圖

古往山川在今來郡邑殊北疆雖入鄭東距豈防吳
幾代傳荆國當時敵陝鄂上流空有處中土復何虞
枕席夷三峽關梁豁五湖承平無異境守隘莫論夫
自罷金門籍來參竹使符端居向林藪微尚在桑榆
直似王陵薏非如甯武愚今茲對南浦乘鴈與雙鳧

登荊州城望江

滔滔大江水天地相終始經閱幾世人復歎誰家子
東望何悠悠西來晝夜流歲月既如此爲心那不愁
秋晚登樓望南江入始興郡路

潦收沙行出霜降天宇晶伏檻一長眺津途多望情

思來江山外望盡煙雲生滔滔不自辨役役且何成
我來颯衰鬢孰云飄華纓櫪馬苦踈躅籠禽念遐征
歲陰向晚晚日夕空屏營物生貴得性身累猶近名
內顧覺今是追歡何時平

登臨沮樓

高深不可厭巡屬復來過本與衆山絕况茲韶景和
危樓入水倒飛檻向空摩雜樹緣青壁樛枝掛綠蘿
潭清能徹底魚樂好跳波有象言難具無端思轉多
同懷不在此孤賞欲如何

登古陽雲臺

庭樹日衰颯風霜未云已駕言遣憂思乘興求相似
楚國茲故都蘭臺有餘址傳聞襄王世仍立巫山祀
方此全盛時豈無嬋娟子色荒神女至魂蕩宮觀侈
蔓草今如積朝雲爲誰起

陪王司馬登薛公逍遙臺

常聞薛公淚非直雍門琴竄逐留遺跡悲涼見此心
府中因暇裕江山幸招尋人事已成古風流獨至今
閑情多感歎清景暫登臨無復甘棠在空餘蔓草深
晴光送遠目勝氣入幽襟水去朝滄海春來換碧林
賦懷湘浦弔碑想漢川沉曾陪遊日徒爲梁甫吟

賀給事嘗詣蔡起居郊館有詩因命同作
記言聞直史築室面層阿豈不承明入終云幽意多
沉冥高士致休澣故人過前嶺游氛滅中林芳氣和
茲辰阻佳趣望美獨如何

常與大理丞裘公太府丞田公偶詣一所林
招尤勝因並坐其次相得甚歡遂賦詩焉以
詠其事

大駕與吾友同懷不異尋偶逢池竹處便會江湖心
夏近林方密春餘水更深清華兩輝映閑步亦窺臨
蘋藻復佳色鳥鷺亦好音韶芳媚洲渚蕙氣襲衣襟

蕭散皆為樂徘徊徒所欽謂予成夙志歲晚共抽簪
與生公尋幽居處

同方久厭俗相與事遐討及此雲山去窅然巖徑好
疑入武陵源如逢漢陰老清諧欣有得幽閑歛盈抱
我本玉堦侍偶訪金仙道茲焉求卜築所過皆神造
歲晚林始敷日晏崖方杲不種緣嶺竹豈植臨潭草
即途可淹留隨日成黼藻期為靜者說曾是終焉保
今為簡書畏祗令歸思浩

與生公遊石窟山

林秘孰云遠忘懷復爾同日尋高深意宛是神仙中

躋險邁靈室詭制非人功
潛洞黜無底殊庭忽似夢
豈如武安鑿自若茅山通
造物良有寄嬉遊迺愜衷
猶希宴玉液從此昇雲空
咄咄共携手冷然且馭風

林亭詠

穿竹非求屢幽閑欲寄情
偶懷因壤石真意在蓬瀛
苔益山文古池添竹氣清
從茲果蕭散無事亦無營
郡舍南有園畦雜樹聊以永日

爲郡久無補越鄉空復深
苟能秉素節安用叨華簪
却步園畦裏追吾野逸心
形骸拘俗吏光景賴閑林
內訟誠知止外言猶匪忱
成蹊謝李逕衛足感葵陰

榮達豈不偉孤生非所任
江城何寂歷秋樹亦蕭森
下有北流水上有南飛禽
我願從歸翼無然坐自沈

臨泛東湖時任洪州

郡庭日休暇湖曲邀勝踐
樂職在中和靈心挹上善
乘流坐清曠舉目眺猶緬
林與西山重雲因北風卷
晶明晝不逮陰影鏡無辨
晚秀復芬敷秋光更遙衍
萬族紛可佳一遊豈能展
羈孤忝邦牧顧已非時選
良公世不容長孺心亦褊
永念出籠繫常思退疲蹇
歲徂風露嚴日恐蘭若剪
佳辰不可得良會何其鮮
罷興還江城閉關聊自遣

始興南山下有林泉常卜居焉荆州卧病有
懷此地

出處各有在何者爲陸沉幸無迫賤事聊可祛迷襟
世路少夷坦孟門未壩嶽多慙入火術常惕履冰心
一跌不自保萬全焉可尋行行念歸路耿耿惜光陰
浮生如過隙先達已吾箴敢忘丘山施亦云年病侵
力衰在所養時謝良不任但憶舊棲息願言遂窺臨
雲間目孤秀山下面清深蘿葛自爲幄風泉何必琴
歸此老吾老過當日千金

高齋閑望言懷

高齋復情景延眺屬 清秋風物動歸思煙林生遠愁
紛吾自窮海薄宦此 中州取路無高足隨波適下流
歲華空冉冉心曲且 悠悠坐惜芳時宴胡然久滯留
與弟遊家園

定省榮君賜來歸是晝遊林鳥飛舊里園菓釀新秋
枝長南庭樹池靈北澗流星霜屢爾別蘭麝爲誰幽
善積家方慶恩深國未酬棲棲將義動安得久情留
郡內閑齋

郡閣書常掩庭蕪日復滋簷風落鳥毳窓葉掛蟲絲
拙病宦情少羈閑秋氣悲理人無異績爲郡但經時

唯有江湖意沉冥空在茲

晨出郡舍林下

晨興步北林蕭散一開襟復見林上月娟娟猶未沉
片雲自孤遠叢篠亦清深無事由來貴方知物外心

司馬崔頌和

優閑表政清林薄賞秋成江上懸曉月往來虧復盈
天雲抗直意郡閣晦高名坐嘯應無欲寧辜濟物情
晨坐齋中偶而成詠

寒露潔秋空遙山分在矚孤頂乍修聳微雲復相續
人茲賞地遍鳥亦愛林旭結念憑幽遠撫躬曷羈束

仰霄謝逸翰臨路嗟疲足徂歲方睽携歸心亟躑躅
休閑償有素豈負南山曲

園中時蔬盡皆鋤理唯秋蘭數本委而不顧
彼雖一物有足悲者遂賦二章

塲藿已成歲園葵亦向陽蘭時獨不偶露節漸無芳
昔異菁為畜甘非蔗有漿人多利一飽誰復惜馨香

又

幸得不鋤去孤苗守舊根無心羨青菴豈欲近名園
遇賞寧克佩為生莫礙門幽林芳意在非是為人論
城南隅山池春中田袁二公盛稱其美夏首

獲賞果會夙言故有此詠

憶昨聞佳境駕言尋昔蹊非唯初物變亦與舊昔遊
幽渚爲君說清晨即我携逢深獨睥睨歷險共攀躋
林筍苞青籜津揚委綠蕙荷香初出浦草色復綠堤
樂處將鷗狎譚端用馬齊且言臨海郡兼話武陵溪
異壤風煙絕空山巖徑迷如何際朝野從此待金闈

林亭寓言

林居逢歲晏遇物使情多蘅蒨不時與芬榮柰汝何
更憐籬下菊無如松上蘿因依自有命非是隔陽和
南山下舊居閑放

祗役已云久乘閑返服初塊然屏塵事幽獨坐林間
清曠前山遠紛喧此地踈喬木凌青靄修篁媚綠渠
耳和繡翼鳥目暢錦鱗魚寂寞心還閉飄飄體自虛
興來命旨酒臨罷閱仙書但樂多幽意寧知有毀譽
尚想爭名者誰云要路居都忘下流歎傾奪竟何如

感遇一

蘭葉春葳蕤桂華秋皎潔欣欣似生意自爾爲佳節
誰知林棲者聞風坐相悅草木有本心何求美人折

其二

幽林歸獨卧滯虛洗孤清持此謝高鳥因之傳遠情

日夕懷空意人誰感至精飛沉理自隔何所慰吾誠
其三

魚遊樂深池鳥棲欲高枝嗟爾鱗游羽薨薨亦何爲
有生豈不化所感奚若斯神理日微滅吾心安得知
浩歎揚朱子徒然泣路岐

其四

孤鴻海上來池潢不敢顧側見雙翠鳥巢在三株樹
矯矯玃木巔得無金丸懼美服患人指高明逼神惡
今我遊冥冥弋者何所慕

其五

吳越數千里夢寐今夕見形骸非我親衾枕即鄉縣
化蝶猶不識川魚安可羨海上有仙山歸期覺神變

其六

西日下山隱北風乘夕流燕雀感昏旦簷楹呼足儔
鴻鵠雖自遠哀音非所求貴人棄疵賤下士嘗殷憂
衆情累外物恕已忘內修感歎長如此使我心悠悠

其七

江南有丹橘經冬猶綠林豈伊地氣暖自有歲寒心
可以薦嘉客柰何阻重深運命推所遇循環不可尋
徒言樹桃李此木豈無陰

其八

永日徒離憂臨風懷蹇修美人何處所孤客空悠悠
青鳥跂不至朱鷺誰云浮夜分起躑躅時逝曷淹留

其九

抱影吟中夜誰聞此歎息美人適異方庭樹含幽色
白雲愁不見滄海飛無翼鳳凰一朝來竹花斯可食

其十

漢上有游女求思安可得袖中一札書欲寄雙飛翼
冥冥愁不見耿耿徒緘憶紫蘭秀空蹊皓露奪幽色
馨香歲欲晚感歎情何極白雲在南山日暮長太息

其十一

我有異鄉憶宛在雲溶溶憑此目不覩要之心所鍾
但欲附高鳥安敢攀飛龍至精無感遇悲惋填心曾
歸來扣寂寞人願天豈從

其十二

閉門跡群化憑林結所思嘯歎此寒木疇昔迺芳蕤
朝陽鳳安在日暮蟬獨悲浩思極中夜深嗟欲待誰
所懷誠已矣既往不可追鼎食非吾事雲山嘗我期
胡越方杳杳車馬何遲遲天壤一何異幽嘿卧簾帷
當塗界寄裴宣州

故人宣城守亦在江南偏如何分虎竹相與間山川
章綬胡爲者形骸非自然含情津渡闊倚望脰空延
遠近聞佳政平生仰大賢推心徒有屬會面良無緣
日夕遵前渚江村投暮煙念行祇意默懷遠豈言宣
委曲風波事難爲尺素傳

敬酬當塗界留贈宣州刺史裴耀卿

茂生寔王佐仲舉信時英氣覩衝天發人將下榻迎
珪符肅有命江國遠徂征九派期方越千鈞或可輕
高帆出風迥孤嶼入雲平遄邁嗟于役離憂空自情
飭簪陪早歲接壤厠專城曠別心彌軫宏規義轉傾
徒然恨饑渴况乃諷瑤瓊

再酬使風見示刺史裴耀卿

茲地五湖隣艱哉萬里人驚颿翻是託危浪亦相因
宣室才華子金閨諷議臣承明有三入去去速歸輪

唐丞相曲江張先生文集卷之三

唐丞相曲江張先生文集卷之四

詩

雜詩五十四首

口號一首

錢王尚書出邊

漢相推人傑殷宗伐鬼方還聞出將重坐見即戎良
上策應為豫中權且用光令申兵氣倍威懾虜魂亡
樹比公孫大城如道濟長夏雲登隴首秋露怯遼陽
武德舒宸睠文思餞樂章感恩身既許激節膽猶嘗
祖帳傾朝列軍麾駐道傍詩人何所詠尚父欲鷹揚

送趙都護赴安西

將相有更踐簡心良獨難遠圖嘗畫地超拜乃登壇
戎即崑山序車同渤海單義無中國費情必遠人安
他日文兼武而今粟且寬自然來月窟何用刺樓蘭
南至三冬晚西馳萬里寒封侯自有處征馬去嘽嘽

送使廣州

家在湘源住君今海嶠行經過中正道相送倍為情
心逐書郵去形隨世網嬰因聲謝遠別緣義不緣名
送姚評事入蜀各賦一物得卜肆

蜀巖化已久沉冥空所思嘗聞賈下處猶憶下簾時

驅傳應經此懷賢儻問之歸來該往事歷歷偶心期

送竇校書見餞得雲中辨江樹

江水連天色天涯淨野氛微明岸傍樹凌亂渚前雲
舉棹形隨轉登艦意漸分渺茫從此去空復惜離羣

餞王司馬入計同用洲字

元寮行上計舉餞出林丘忽望題輿遠空思解榻遊
別筵鋪柳岸征棹倚蘆洲獨歎湘江水朝宗向北流

東湖臨泛餞王司馬

南土秋雖半東湖草木黃聊乘風日好來泛芰荷香
蘭棹每勞速菱歌不厭長忽懷京洛去難與共清光

餞濟陰梁明府各探一物得荷葉

荷葉生幽渚芳華信在茲朝朝空此地采采欲因誰
但恐星霜改還將蒲稗衰懷君美人別聊以贈心期
餞陳學士還江南同用徵字

荷篠旋江澳街杯餞霸陵別前林鳥息歸處海煙凝
風土鄉情接雲山客念憑聖朝巖穴選應待鶴書徵
通化門外送別

屢別容華改長愁意緒微義將私愛隔情與故人歸
薄宦無時賞勞生有事機離魂今夕夢先繞舊林飛
送楊道士往天台

鬼谷還成道天台去學仙行應松子化留與世人傳
此地煙波遠何時羽駕旋當湏一把袂城郭共依然

送楊府李功曹

平生屬良友結綬望光輝何知人事拙相與宦情非
別路穿林盡征帆際海歸居然已多意况復兩鄉違
送宛句趙少府

解巾行作吏樽酒謝離居修竹含清景華池澹碧虛
地將幽興愜人與舊遊踈林下紛相送多逢長者車

送韋城李少府

送客南昌尉離亭西候春野花看欲盡林鳥聽猶新

別酒青門路歸軒白馬津相知無遠近萬里尚為鄰

送蘇主簿赴偃師

我與文雄別胡然色吏歸賢人安下位鷺鳥欲卑飛
激節輕華冕移官狗綵衣羨君行者樂從此拜庭闈

送廣州周判官

海郡雄蠻落津亭壯越臺城隅百雉映水曲萬家開
里樹枕榔出時禽翡翠來觀風猶未盡早晚使車迴

別鄉人南還

橘柚南中暖桑榆北地陰何言榮落異因見別離心
吾亦江鄉子思歸夢寐深聞君去水宿結思泐雲林

牽綴從浮事遲迴謝所欽東南行舫遠秋浦念猿吟

郡江南上別孫侍郎

雲嶂天涯盡川途海縣窮何言此地僻忽與故人同
身負邦君弩情紆御史驄王程不我駐離思逐秋風

奉酬洪州江上見贈監察御史孫翊

受命讞封疆逢君牧豫章於焉審虞芮復爾共舟舫
悵別秋陰盡懷歸客思長江臯枉離贈持此慰他鄉

江上遇風疾

疾風江上起鼓怒揚煙埃白晝晦如夕洪濤聲若雷
接林鳥鍛羽入浦魚曝鰓瓦飛屋且發帆快檣已摧

不知天地氣何爲此喧騰

初發江陵有懷

極望涖陽浦江天渺不分扁舟從此去鷗鳥自爲群
他日懷真賞中年負俗紛適來果微尚倏爾會斯文
復想金閨籍何如夢渚雲我行多勝寄浩思獨氛氲

自豫章南還江上作

歸去南江水磷磷見底清轉逢空闊處聊洗滯留情
浦樹遙如待江鷗近若迎津途別有趣况乃濯吾纓

道逢北使題贈京邑親知

征騾稍靡靡去國方遲遲路繞南登岸情搖北上旗

故人憐別日旅鴈逐歸時歲晏無芳草將何寄所思

江上使風呈裴宣府

江路與天連風帆何淼然遙林浪出沒孤舫鳥聯翩
常自千鈞重深思萬事捐報恩非徇祿還逐賈人船

谿行寄王震

山氣朝來爽谿流自向清遠心何處愜閑棹此中行
叢桂林間待群鷗水上迎徒然適我願幽獨爲誰情

將至岳陽有懷趙二

湘浦多深林青冥晝結陰獨無謝客賞况復賈生心
草色雖云發天光或未臨江潭非所遇爲爾白頭吟

南陽道中作

登郢屬歲陰及宛憤所適復聞東漢主遺此南都迹
佳氣藹厥初霸圖紛在昔茲邦稱貴近與世嘗薰赫
遭遇感風雲變衰空草澤不識鄧公樹猶傳陰后石
驅馬歷闔閭荆榛翳阡陌事去物無象感來心不憚
懷古對窮秋興言傷遠客眇默遵岐路辛勤弊行役
雲鴈號相呼林麇走自索顧憶狗書劒未嘗安枕席
豈暇墨突黔空持遼豕白迷復期非遠歸歟賞農隙

西江夜行

遙夜人何在澄潭月裏行悠悠天宇曠切切故鄉情
外物寂無擾中流澹自清念歸林葉換愁坐露華生
猶有汀洲鷺宵分乍一鳴

使還湘水

歸舟宛何處正值楚江平夕逗煙村宿朝緣浦樹行
于役已彌歲言旋今愜情鄉郊尚千里流目夏雲生
初發道中寄遠

湘中作

日夜鄉山遠秋風復此時舊聞胡馬思今聽楚猿悲
念別朝昏苦懷歸歲月遒壯圖空不息常恐髮如絲
湘流繞南嶽絕目轉青青懷祿未能已瞻途屢所經

煙嶼宜春望林猿莫夜聽水路日多緒孤舟天復冥
浮沒從此去嗟嗟勞我形

自湘水南行

落日催行舫逶迤洲渚間誰云有物役乘此更休閒
暝色生前浦清暉發近山中流澹容與唯愛鳥飛還
南還湘水言懷

拙宦今何有勞歌念不成十年乖夙志一別悔前行
歸去田園老儻來軒冕輕江間稻正熟林裏桂初榮
魚意思在藻鹿心懷食葦時哉苟不達取樂遂吾情
初入湘中有喜

征鞍窮郢路歸棹入湘流望鳥唯貪疾聞猿亦罷愁
兩邊楓作岸數處橘爲洲却計從來憶翻疑夢裏遊

商洛山行懷古

園綺值秦末嘉遁此山阿陳迹向千古荒途始一過
碩人久淪謝喬木自森羅故事昔嘗覽遺風今豈訛
泌泉空活活樵叟獨皤皤是處清暉滿從中幽興多
長懷赤松意復憶紫芝歌避世辭軒冕逢時解薜蘿
盛明今在運吾道竟如何

耒陽溪夜行

乘夕棹歸舟緣源路轉幽月明看嶺樹風靜聽溪流

嵐氣船間入霜華衣上浮猿聲雖此夜不是別家愁

江上

長林何繚繞遠水復悠悠盡日餘無見爲心那不愁
憶將親愛別行爲主恩酬感激空如此芳時屢已道

自彭蠡湖初入江

江岫殊空闊雲煙處處浮上來群噪鳥中去獨行舟
窄落誰相顧逶迤日自愁更將心問影于役復何求

赴使瀧峽

谿路口幽深寒空入兩嶽霜清石丈水風落萬重林
夕鳥聯歸翼秋猿斷去心別離多遠思况乃歲方陰

湖口望廬山瀑布水

萬丈洪泉落迢迢半紫芬犇飛下雜樹洒落出重雲
日照虹蜺似天清風雨聞靈山多秀色空水共氤氳

彭蠡湖上

公涉經大湖湖流多行洗決晨趨北渚逗浦已西日
所適雖淹曠中流且閑逸瑰詭良復多感見乃非一
廬山直陽澣孤石當陰術一水雲際飛數峰湖心出
象類何交糺形言豈深悉且知皆自然高下無相恤

經江寧覽舊跡至玄武

南國更數世此湖方十洲天清華林苑日晏景陽樓

果下廻仙騎津傍駐綵旒鳧鷖喧鳳管荷芰闔龍舟
七子陪詩賦千人和棹謳應言在鎬樂不讓橫汾秋
風俗因紓慢江山成易由駒王信不武孫叔是無謀
佳氣日將歇霸功誰與修桑田東海變麋鹿姑蘇遊
否運爭三國康時劣九州山雖幕府在館豈豫章留
水淀還相閱菱歌亦故道雄圖不足問唯想事風流
入廬山仰望瀑布水

絕頂有懸泉喧喧出煙杪不知幾時歲但見無昏曉
閃閃青崖落鮮鮮白日皎洒流濕行雲濺水驚飛鳥
雷吼何噴薄箭馳入窈窕昔聞山下蒙今乃林巒表

物情有詭激坤元曷紛矯默然置此去變死誰能了

出為豫章郡途次廬山東巖下

茲山鎮何所乃在澄湖陰下有蛟螭伏上與虹蜺尋
靈仙未始曠窟宅何其深雙闕出雲峙三官入煙沉
攀崖猶惜鏡種杏非舊林想像終古跡惆悵獨徃心
紛吾嬰世網數載忝朝簪孤根自靡託量力况不任
多謝周身防常恐橫議侵豈匪鶴鴻列惕如泉壑臨
迨茲刺江郡來此滌塵襟有趣逢樵客忘懷狎野禽
棲閑義未果用拙歡在今願言答休命歸事丘中琴

巡屬縣道中作

春令夙所奉駕言遵此行途中却郡掾林下招村民
至邑無紛列來人但歡迎豈伊念邦政爾實在時清
短才濫符竹弱歲起柴荆再入江村道永懷山藪情
矧逢陽節獻默聽時琴鳴迹與素心別感從幽思盈
流芳日不待夙志蹇無成知命且何欲所圖唯退耕
華簪極身泰衰鬢慙木榮苟得不可遂吾其謝世嬰

南還以詩代書贈京都舊寮

薄宦晨昏闕遵尊義取斯窮愁年貌改寂歷爾胡爲
不諂詞多忤無容禮益卑微生尚何有遠跡固其宜
思擾梁山曲情遙越鳥枝故園從海上良友邈天涯

雲雨歎一別川原勞載馳上慙伯樂顧中負叔牙知
去國誠寥落經途弊險巖歲逢霜雪苦林屬蕙蘭萎
欲贈幽芳歇行悲舊賞移一從關作限兩見月成規
苒苒窮年齋行行盡路岐征鞍稅北渚歸帆指南垂
樹晚猶葱蒨江寒尚渺瀰士風從楚別山水入湘竒
石瀨相奔觸煙林更蔽虧層崖夾洞浦輕舸泛澄漪
松篠行皆傍禽魚動輒隨惜哉邊地隔不與故人窺
疇昔陪鴛鷺朝陽振羽儀來音雖寂寞接景每逶迤
朝罷冥塵事賓來話酒卮邀歡逐芳草結興選華池
及此風成歎何時露可披自憐無用者誰念有情離

望美音容闊懷賢夢想破因聲達霄漢持拙守東陂
初發道中贈正司馬兼寄諸公

昔歲嘗陳力冲年退屏居承顏方弄鳥故性或觀魚
曾是安疵拙載非議卷舒林園事益簡煙月賞恒餘
不意棲愚谷無階奉詔書湛恩均大造弱植愧空虛
肅命趨仙闕僑裝撫傳車念行開祖帳憐別降題輿
誰謂風斯許叨延禮數賒我沾投分末情及解携初
追餞扶江界光輝燭里閭子雲應寂寞公緒爲吹噓
景物春來異音容日向踈川原行稍穩鐘鼓聽猶徐
林隔王公輦雲迷班氏廬戀親唯委咽思德更躊躇

徇義當由此懷安乃闕如願酬明主惠行矣豈徒歟
夏日奉使南海在道中作

緬然萬里路赫曦三伏時飛走逃深林流爍恐生疵
行李豈無苦而我方自怡蕭事誠在公拜慶遂及私
展力慚淺效銜恩感深慈且欲湯火蹈况無鬼神欺
朝發高山阿夕濟長江湄秋瘴寧我毒夏水胡不夷
信知道存者但問心所之呂梁有出入乃覺非虛詞

滇陽峽

行舟傍越岑窈窕越溪深水闌先秋冷山晴當晝陰
重林間五色對壁聳千尋惜此生遊遠誰知造化心

使至廣州

昔年嘗不調茲地亦遭迴本謂雙鳧少何知駟馬來
人非漢使棠都楚越王臺去去雖殊事山川長在哉
春江晚景

江林皆秀發雲日復相鮮征路那逢此春心益駉然
興來祇自得佳處莫能傳薄暮津亭下餘花滿客船
與王六履震廣州津亭曉望

明發臨前渚寒來淨遠空水紋天上碧日氣海邊紅
景物紛爲異人情賴此同乘桴自有適非欲破長風

初發曲江谿中

溪流清且深松石復陰臨正爾可嘉處胡爲無賞心
我猶不忍別物亦有緣侵自匪嘗行邁誰能知此音

自始興谿夜上赴嶺

嘗畜名山意茲爲世網牽征途屢及此初復已非然
日落青巖際谿行綠篠邊去舟乘日後歸鳥息人前
數曲迷幽嶂連圻觸閭泉深林風緒結遙夜客情懸
非梗胡爲泛無膏亦自煎不知于役者相樂在何年

奉使自藍田玉山南行

征騾入雲壑情始步金門通籍微軀幸歸途明主恩
匪唯徇行役兼得慰晨昏是節暑云熾紛吾心所尊

海縣且悠緬山郵日駿奔徒知惡置事未暇息陰論
峴武經陳迹衡湘指故園水聞南澗險煙望北林繁
遠靄千巖合幽聲百籟喧陰泉夏猶凍陽景晝方曠
懿此高深極徒令夢想存盛明期有報長徃復奚言

巡按自灘水南行

理棹雖云遠飲水寧有惜况乃佳山川怡然傲潭石
竒峯岌前轉茂樹隈中積猿鳥聲自呼風泉激目因
詭容逆心與清暉滌紛吾謬執簡行郡將移檄即事
聊獨歡素懷豈兼適悠悠詠靡諂庶以窮日夕

使還都湘東作

蒼庚昨歸候陽鳥今去時感物遽如此勞生安可思
養真無上格圖進豈前期甘節往來苦壯容離別衰
盛明非不遇弱操自云私孤楫清川渚征衣寒露滋
風朝津樹落日夕嶺猿悲牽役而無悔坐愁祗自怡
當須報恩已終爾謝塵縉

旅宿淮陽亭口號

日暮荒亭上悠悠旅思多故鄉臨桂水今夜眇星河
暗草霜華發空亭鴈影過興來誰與晤勞者自為歌

唐丞相曲江張先生文集卷之四

唐丞相曲江張先生文集卷之五

詩

雜著五十三首

望月懷遠

海上生明月，天涯共此時。
情人怨遙夜，竟夕起相思。
滅燭憐光滿，披衣覺露滋。
不堪盈手贈，還寢夢佳期。

秋夕望月

清迥江城月，流光萬里同。
所思如夢裏，相望在庭中。
皎潔青苔露，蕭條黃葉風。
含情不得語，頻使桂華空。

詠鸞

海鷺何微眇，乘春亦暫來。豈知泥滓賤，祇見玉堂開。
繡戶時雙入，華軒日幾迴。無心與物競，鷹隼莫相猜。

詠史

大德始無頗，中智是所是。居然已不一，况乃務相詭。
小道致泥難，巧言因萋毀。穰侯或見遲，蘇生得陰揣。
輕既長沙傳，重亦邊郡徙。勢傾不幸然，跡在胡寧爾。
滄溟所為大，江漢日來委。澧水雖復清，魚鱉豈游此。
賢哉有小白，讐中有管氏。若人不世生，悠悠多如彼。

勅賜寧主池宴

賢王有池館，明主賜春遊。淑氣林間發，恩光水上浮。

徒叅和鼎地，終謝巨川舟。皇澤空如此，輕生莫可酬。

龍門旬宴得月字韻

恩華逐芳歲，形勝兼韶月中。席傍魚潭前，山倚龍闕。
花迎妙妓至，鳥避仙舟發。宴衍良在茲，再來情不歇。

天津橋東旬宴得歌字韻

清洛象天河，東流形勝多。朝來逢宴喜，春盡却妍和。
泉鮪歡時躍，林鶯醉後歌。賜恩頗若此，為樂柰人何。

上賜水臈旬宴得移字韻

河漢非應到，汀洲忽在斯。仍逢帝樂下，如逐海槎窺。
春賞時將換，皇恩歲不移。今朝遊宴所，莫比天泉池。

故刑部李尚書荆谷山集會

嘗聞繼老聃身退道迷躄結宇倚青壁
疏泉噴碧潭
苔石隨人古煙花寄酒酣
山光紛向夕歸興杜城南
三月三日申王園亭宴集

稽亭追往事
雕苑勝前聞
飛閣凌芳樹華池落綵雲
藉草人留酌
花鳥赴群向來同賞處
惟恨碧林曛

恩賜樂遊園宴

寶筵延厚命
供帳序群公
形勝宜春接威儀
建禮同
晞陽人似露
解愠物從風
朝慶千齡始年華
二月中
輝光遍草木
和氣發絲桐
歲歲為無事
寧知樂九功

驪山下逍遙公舊居遊集

君子體清尚歸處有兼資
雖然經濟日無忘幽棲時
卜居舊何所休澣嘗來茲
岑寂空人至高深獲我思
松澗聆遺風蘭林覽餘滋
往事誠已矣道存猶可追
遺子後黃金作歌先紫芝
明德有自來奕世皆秉彝
豈與磻溪老崛起周太師
我心希碩人逮此問元龜
怛悵既懷遠沉吟亦省私
已云寵祿過况在華髮衰
軒蓋有迷復丘壑無磷緇
感物重所懷何但止足斯

祠紫蓋山經玉泉山寺

指塗躋楚甸策門望荆岑
稍稍松篁入泠泠澗谷深

觀竒逐幽映歷險志嶇嶇上界授佛影中天揚梵音
焚香懺在昔禮足誓來今靈異若有對聖先其可尋
高星聞逝者遠俗是初心蘚剝經行處猿啼燕坐林
歸真已寂滅留迹豈埋沉法地日茲廣何云千萬金
冬中至玉泉山寺屬窮陰水閑崖谷無景及
仲春行縣復往焉故有此作

靈境信幽絕芳時重暄妍再來及茲勝一遇非無緣
萬木柔可結千花敷欲然松間鳴好鳥林下流清泉
石壁開精舍金光照法筵真空本自寂假有聊相宣
復此灰心者仍追巢頂禪簡書雖有畏身世亦俱捐

郢城西北有大古塚數十觀其封域多是楚
時諸王而年代久遠不復可識唯直西有樊
妃冢因後人爲植松柏故行路盡知之

蘋藻生南澗蕙蘭秀中林嘉名有所在芳氣無幽深
楚子初逞志樊妃嘗獻箴能令更擇士非直罷從禽
舊國皆湮滅先王亦莫尋唯傳賢媛隴猶結後人心
牢落山川意蕭疎松栢陰破墻時直上荒徑或斜侵
惠問終不絕風流獨至今千春思窈窕黃鳥復哀音

戲題春意

一作江南守江林三四春相鳴不及鳥相樂喜關人

日守朱絲直年催華髮新淮陽祇有卧持此度芳辰
同綦母學士月夜聞鴈

棲宿豈無意飛飛更遠尋長途未及伴中夜有遺音
月思關山路風號流水琴空聲兩相應幽感一何深
避繳歸南浦離群叫北林聯翩俱不定憐爾越鄉心
立春日晨起對積雪

忽對林亭雪瑤華處處開今年迎氣始昨夜伴春迴
玉潤窓前竹花繁院裏梅東郊齋祭所應見五神來
庭梅詠

芳意何能早孤榮亦自危更憐花蒂弱不受歲寒移
朝雪那相妬陰風已屢吹馨香雖尚爾飄蕩復誰知
照鏡見白髮聯句

宿昔青雲志蹉跎白髮年誰知明鏡裏形影自相憐
折楊柳

纖纖折楊柳持此寄情人一枝何足貴憐是故園春
遲景那能久流芳不及新更愁征戍客容鬢老邊塵
巫山高

巫山與天近煙景嘗青熒此中楚王夢夢得神女靈
神女去已久雲雨空冥冥唯有巴猿嘯哀音不可聽
翦綵

姹女矜容色爲花不讓春既爭芳意早誰待物華真
葉作參差發枝從點綴新自然無限態長在艷陽人

聽箏

端居正無緒那復發秦箏纖指傳新意繁絃起怨情
悠揚思欲絕掩抑態還生豈是聲能感人心自不平
賦得自君之出矣

自君之出矣不復理殘機思君如滿月夜夜減清輝

荊州作二首

先達志其大求意不約文士伸在知己已泥仕於君
微誠夙所尚細故不足云時來忽易矣事往良難分

顧念凡近姿焉欲殊常勲亦以行則是豈必素有聞
千慮且猶跌萬緒何其紛進士苟非黨免相安得群
衆口金可鑠孤心絲共焚意忠仗朋信語勇同敗軍
古劍徒有氣幽蘭祗自薰高秩向所忝於義如浮雲

其二

千載一遭遇徃賢所至難問余奚爲者無階忽上搏
明聖不世出翼亮非苟安崇高自有配孤陋何足干
遇恩一時來竊位三歲寒誰謂誠不盡知窮力亦殫
雖致負乘寇初無挾術鑽浩蕩出江湖翻覆如波瀾
心傷不林樹自念獨飛翰狗義在匹夫報恩猶一殮

况乃山海澤效無毫髮端內訟已慙沮積毀今摧殘
胡爲復惕息傷鳥畏虛彈

在郡秋懷二首

秋風入前林蕭颺鳴高枝寂寞遊子思寤歎何人知
宦成名不立志存歲已馳五十而無聞古人深所疵
平生去外飾直道如不羈未得操割效忽復寒暑移
物情自古然身退即亦隨悠悠滄江渚望望白雲涯
路下霜且降澤中草離披蘭艾若不分安用馨香爲

其二

庭蕪生白露歲候或心遐心策蹇慙遠途巢枝思故林
小人恐致寇終日如臨深魚鳥好自逸池籠安所欽
掛冠東都門採薇南山岑議道誠愧昔覽分還愜今
無然憂成老空爾白頭唵

郡府中每晨興輒見群鶴東飛至暮又行列
而返哢唳雲路其和樂焉予愧獨處江城常
目送此意有所羨遂賦以詩

雲間有數鶴撫翼意無遺曉日東田去霄煙北渚歸
謹呼良自適羅列好相依遠集長江靜高翔衆鳥稀
豈煩仙子叙何畏野人機却念乘軒者拘留不得飛
忝宮二十年盡在內職及爲郡嘗積戀因賦

詩馬

江流去朝宗晝夜茲不捨仲尼在川上子牟存闕下
聖達有由然孰是無心者一郡苟能化百城豈云寡
愛禮誰爲羊戀主吾猶馬感初時不載思奮翼無假
閑宇嘗自閉沉心何用寫攬衣步前庭登陴臨曠野
白水生迢遞清風寄瀟灑願言采芳澤終朝不盈把
初秋憶金均兩弟

江渚秋風至他鄉離別心孤雲愁自遠一葉感何深
憂喜嘗同城飛鳴忽異林青山西北望堪作白頭吟
二弟宰邑南海見群鴈南飛因成詠以寄

鴻鴈自北來嗷嗷度煙景嘗懷稻梁東豈憚江山永
小大每相從羽毛當自整雙鳧侶晨泛獨鶴叅霄警
爲我更南飛因書至梅嶺

將發還鄉示諸弟

歲陽亦頽止林意日蕭摵云胡當此時緬邁復爲客
至愛孰能捨名義來相迫負德良不貲輸誠靡所惜
一木逢厦構纖塵願山益無力主君恩寧利客卿壁
去去榮歸養憮然歎行役

叙懷二首

弱歲讀群史抗迹追古人被褐有懷玉佩印從負薪

志合豈兄弟道行無賤貧孤根亦何賴感激此爲鄰

其二

晚節從卑秩岐路良非一既聞持兩端復見挾三術
木瓜誠有報玉楮論無實已矣直躬者平生壯圖失
去去勿重陳歸來茹芝朮

秋懷

感惜芳時換誰知客思懸憶隨鴻向暖愁學馬思邊
留滯機還息紛拏網自牽東南起歸望何處是江天

雜詩五首

孤桐亦胡爲百尺傍無枝踈陰不自覆修幹欲何施

高岡地復迥弱植風屢吹凡鳥已相噪鳳凰安得知

其二

蘿藦必有託風霜不能落酷在蘭將蕙甘從葵與藿
運命雖爲宰寒暑自迴薄悠悠天地間委順無不樂

其三

良辰不可遇心賞更蹉跎終日塊然坐有時勞者歌
庭前攬芳蕙江上託微波路遠無能達憂情空復多

其四

湘水弔靈妃班竹爲情緒漢水訪遊女解佩無誰與
同心不可見異路空延佇浦上青楓林津傍白沙渚

行吟至落日坐望祇愁予神物亦豈孤佳期竟何許

其五

木直幾自冠石堅亦他攻何言爲用薄而與火膏同
物累有固然誰能取徑通纖纖良田草靡靡唯從風
日夜沐甘澤春秋等芳叢生性苟不失香臭誰爲中
道家貴至柔儒生何固窮終始行一意無乃過愚公

故刑部李尚書挽歌詞三首

仙宗出趙北相業起山東明德嘗爲禮嘉謀屢作忠
論經白虎殿獻賦甘泉宮與善今何在蒼生望已空

其二

宿昔三台踐榮華駟馬歸印從青瑣拜翰入紫宸揮
題劍恩方重藏舟事已非龍門不可望感激涕沾衣

其三

永歎常山寶沉埋京兆阡同盟會五月華表記千年
渺漫野中草微茫空裏煙共悲人事絕唯對杜陵田
故徐州刺史贈吏部侍郎蘇公挽歌詞三首
韋玄方繼相荀爽復齊名在貴兼天爵能賢出世卿
學聞金馬詔神見玉人情藏壑今如此爲山遂不成

其二

相如只謝病子敬忽云亡豈悟瑤臺雪分雕玉樹行

清規留草議故事在封章本謂山公啓而今歿始揚

其三

返葬長安陌秋風簫鼓悲奈何相送者不是平生時
寒影催年急哀歌助晚遲寧知建旆罷丹旆向京師
故榮陽君蘇氏挽歌詞三首

門緒公侯列嬪風詩禮行松蘿方有寄桃李忽無成
劔去雙龍別雛哀九鳳鳴何言嶧山樹還似半心生

其二

永嘆芳魂斷行看草露滋二宗榮盛日千古別離時
竟罷生芻贈空留畫扇非恐客車候曉發何歲是歸期

其三

縞服紛相送玄纁翳不開更悲泉火滅徒見柳車迴
舊室容衣奠新塋拱樹栽唯應月照簾潘岳此時哀
眉州康司馬挽歌詞

家受專門學人稱入室賢劉禎徒有氣管輅獨無年
謫去長沙國魂歸京兆阡從來匣中劔埋歿罷衝天

題畫山水障

心累猶不盡果爲物外牽偶因耳目好復假丹青妍
嘗抱野間意而迫區中緣塵事固已矣秉意終不遷
良工適我願妙墨揮巖泉變化合群有高深侔自然

置陳北堂上做像南山前靜無戶庭出行已茲地偏
萱草憂可樹合歡忿亦蠲所因本微物况乃憑幽筌
言象會自泯意色聊自宣對翫有佳趣使我心眇綿

唐丞相曲江張先生文集卷之五終

唐丞相曲江張先生文集卷之六
制書

南郊赦書

東封赦書

后土赦書

籍田赦書

南郊赦書

門下朕獲主三靈于今一紀聽政中是每不敢康觀
書一夜將求諸道而頃年已來每思至理或遠人勿
率或嗣歲不登淳朴未還惕厲斯在為人上而慙德

奉天明以畏威故祝史正辭必期於陳信郊丘備禮
將俟於昇平今宗廟降靈克開厥後乾坤交泰保合
大和麟鳳龜龍玄符黃瑞之祉蠻夷戎狄梯山航海
之琛莫不日月以聞道路相屬顧惟不德當茲休運
欽若昭報疇咨故實所以今年獻春恭祠后土季秋
吉日追崇九廟採必先於曾經稽肆類於虞典爰因
長至欽謁上玄告受命之元符昭嚴配之成績大典
云備至誠克展諸侯駿奔來於穆之相百神受職率
咸秩之文六變已陳三獻斯畢蓋春秋之大事莫先
乎祀王者之盛禮莫重於郊柴燎克終感慶罔極豈

予一人之福亦爾萬邦之賴宜因咸和之際俾承厚
下之澤可大赦天下嗚呼君臣一體休戚共焉朕欽
承天命躬傳大寶蓋憑累祖餘業得一之符亦由群
公舊勳不二之力永言繫賴其敢忘之自武德已來
實封功臣知政宰輔有身無大故而亡官實封子孫
淪屈者所由勘責具狀以聞存者可籌其官榮逝者
當錄其胤嗣使幽明同慶知有令辰

東封赦書

門下朕聞天監唯后后克奉天既合德以受命亦推
功而復始厥初作者七十二君道治跡著時至符出

皆用事于介丘升中於上帝人神之望蓋有以塞之
皇王之序固可得而言之朕接統千歲承光五葉惟
祖宗之德在人惟天地之靈作主往有內難幽贊而
集大勲間無外虞守成而續舊服未嘗不乾乾終日
思與公卿大夫上下叶心聿求至理引我烈聖其庶
乎馨香今九有大寧群氓樂業時必敬授而不奪物
亦順成而無天懋建皇極幸致大和聚乃幽遐率由
咸被戎狄不軌唯文告而來庭鱗鳳已臻將覽悟而
在藪以故凡百執事亟言大封顧惟不德初欲勿議
伏以先聖儲祉與天同功荷傳符以在今敢侑神而

無報大節斯在朕何讓焉遂奉遵高祖太宗之業憲
章乾符之典時邁東土柴告岱宗精意上達胎蠶來
應信宿行事雲物呈祥登降之禮斯畢嚴配之誠獲
展百神群望莫不懷柔四方諸侯莫不來慶斯事天
下之介福邦家之耿光也無窮之休祉豈獨在予非
常之惠澤宜其逮下可大赦天下朕躬陟天門宿齋
日觀時屬嚴冬雪候初夜風寒朕因露立祈恩誓欲
代人當咎俯仰之際頓首霜感奠獻之辰變同韶景
誠荷上天垂祐亦賴靈山吐祥詩云無德不報宜封
太山神爲天齊王禮秩加三公一等宜令所管崇飾

祠廟環山十里禁其採樵給近山二十戶復以奉神
祠率土之內賜酺七日任於村坊宴樂不得聚斂煩
勞其節文有未露及者所司比類奏聞其封祀有數
處行事者從一處叙赦書日行五百里主者施行

后土赦書

門下昔者巡狩所至柴瘞斯者蓋取誠享以遵告類
朕恭承祖宗之烈獲主神祇之祀夙夜祇畏不敢荒
寧故勒兵朔陸先展義於汾社迴旆睢上遂有事於
郊壇王者父事天母事地則漢氏祈穀未始正名周
禮降神乃爲徽福而已朕以天命之重予道爲先惟

茲精神在乎敦孝庶蒙福於四海斯永康於兆人是
以率由舊章敬恭明祀嚴配之誠既展奠獻之禮又
終且春秋之議大事若祀齋祭之福庶品維祺豈獨
在予而共有斯慶可大赦天下

籍田赦書

門下昔者受命爲君體元立極未有不謹於禮而能
見教於人朕其庶乎有慙作者方冊存而可舉舊章
絕而復尋自古所行無一而廢將以上乞靈於宗社
下蒙福於黎元朕茲精誠天實降鑒今嗣歲初吉農
事將起禮有先於耕籍義緣奉於粢盛是所嚴祇敢

不敬事故躬載耒耜親率公卿以先萬姓遂終千畝
謂敦本之爲小何布澤之更深宜有順於發生俾無
偏於行惠可大赦天下宗廟致享務在豐潔禮經
弘革必本人情遵豆之薦或未能備物服制之紀或有
所未通宜令禮官學士詳議具奏朕自臨天下一紀
于茲不敢荒寧日加兢業而災青未弭黎人未康若
有由而然則在予之責有能直言極諫者具以狀聞
每涓賢良無忘鑒味頃雖虛佇未副旁求其才有王
霸之畧學究天人之際智勇堪將帥之選政能當牧
宰之舉者五品已上清官將軍都督刺史各舉一人

孝悌力田鄉閭推挹者本州長官勘責有才堪應務
者各以名聞致仕官久歷清資始終稱著年漸老邁
情有可矜量與改職依前致仕宗子中有才行著聞
比尚沉屈者委宗正勘實奏聞唐元兩營立功官任
折衝並改與即將即將改與中即其亡官失爵量加
收叙五岳四瀆名山大川及自古聖帝明王忠臣良
相並令所在長官以禮致祭赦書有所夫該者所司
比類奏聞亡命山澤挾藏軍器百日不首復罪如初
敢以赦前事相言告者以其罪罪之都城內賜酺三
日布告遐邇咸使知聞

唐丞相曲江張先生文集卷之六

西



